

中華民國郵政特准掛號認爲新聞紙類

長沙長治路鴻飛印刷所代印

中華民國八年六月二二至二三三日 第一百八十一號

湖南政報

價目

- (一) 本報每月每份現洋一元
- (二) 外埠每月每份另加郵費二角
- (三) 每册零售八分

湖南政報處發行

目錄

▲中央命令

大總統令九則

本省文告

訓令

湖南省長公署訓令省會警察廳據交涉署呈覆辦理唐起

明假冒日商名義一案情形由

湖南省長公署訓令衡陽縣知事據該縣商彭錫榮等呈

為遵章採運請領各票由

湖南省長公署訓令 湖田局 據姚麓波呈捧批瀆請仰

懸查據原呈令縣秉公復訊以保成例而斬惡蔓由

指令

湖南省長公署指令高等檢察廳據呈甯鄉縣知事疏脫遞

解死刑人犯請提付懲戒由

湖南省長公署指令湘鄉縣知事呈寶華教士黃瑞堂接管

教堂房產清冊請分別存轉由

湖南省長公署指令平江縣知事據呈為遵令查明敢明女

校職業各班學生數目懇核示由

湖南省長公署指令湘潭縣知事據呈為組織湘潭城鄉女子蠶桑社會訂定辦法請鑒核由

咨呈

湖南省長公署咨呈國務院據高等檢察廳呈稱寧鄉知事余聯輝疏脫遞解死刑人犯請提付懲戒由

告示

湖南高等審判廳佈告 (奉司法部銑電定期在京師舉行司法官考試佈告周知由)

附錄

湘潭縣知事為湘潭城鄉女子蠶桑社會呈 省長文 (附清摺)

◎中央命令

●大總統令

▲國務總理兼內務總長錢能訓迭呈辭職情詞懇摯錢能訓准免本職此令

▲特任龔心湛暫兼代理國務總理此令

▲據交通部呈試辦郵政儲金擬自七月一日為始在北京天津太原開封濟南漢口南昌南京上海安慶杭州等處先行開辦並請明令提倡等語此項郵政儲金各國通行已久意在獎成勤儉康濟民生洵屬法良意美既經該部籌擬仿行應即督飭各局切實辦理并當分別曉導認真提倡總期家給人足相習成風以副嘉惠閭閻之意此令

▲特派徐樹錚為西北籌邊使此令

▲任命林棨為江蘇高等審判廳長此令

▲司法總長朱深呈請任命梁柏年楊學禮為僉事均照准此令

▲陸軍總長靳雲鵬呈請任命金吾為陸軍第五師正軍械官齊寶賢為步兵第十八團團附周原健為步兵第二十團第一營營長郭廣山為騎兵第五團第三營營長均照准此令

▲陸軍總長靳雲鵬呈請將陸軍第五師正軍械官任鼎銘步兵第二十團第一營營長吳毓麟騎兵第五團第三營營長胡光順免去本職均照准此令

◎茲制定僑居境內無約國人民課稅章程公布之此令

中央命令

教令第十一號

僑居境內無約國人民課稅章程

第一條 無約國人民運貨進口應遵照國定關稅條例完納海關稅課

第二條 無約國人民運貨入中國內地銷售時應照章完納內地一切稅釐雜捐不得在海關請領

子口單

第三條 無約國人民不得以三聯單入內地採買土貨

第四條 無約國人民在內地運貨不得享受免稅及機製洋貨運單之利益

第五條 無約國人民不得在內地充當牙紀

第六條 本章程自公布日施行

中華民國八年六月十三日

●本省文告

●訓令

◎湖南省長公署訓令 字第 號

令省會警察廳(據交涉署呈覆辦理唐起明假冒日商名義一案情形由)

為訓令事案據外交部特派湖南交涉員朱孝威呈稱案奉鈞署交字第四六七四號訓令據水上警察廳呈報洋商包攬華船懸掛洋旗一案飭即會同日本領事秉公查辦以杜假冒等因奉此職署遵即致函日領聲明現有華人唐起明小船舶一艘由靖港運穀一百二十石停泊省河永州碼頭在日人華清洋行商店領用紅日白旗升懸船檣包庇買賣業由水警廳令將旗幟繳銷應請嚴諭居留長沙日商嗣後不得包庇華商領掛洋旗等因去後茲准該領查明長沙日商並無華清洋行之名認為唐起明假冒名義備函答覆前來除逕咨水警廳請將唐起明拘案追辦藉儆效尤外理合具文呈覆附繳奉發圖表伏乞俯賜察核令行省會警察廳查照如經查有日商華清洋行及以經理名義營業者應即查封嚴辦以杜假冒深為公便等情據此除指令呈悉船戶唐起明假冒名義懸掛日旗自非拘案懲辦不足以儆效尤既據該署逕咨水警廳拘究辦理甚是仍候令行省會警察廳查照來呈如查有日商華清洋行及以經理處名義營業者即予查封嚴辦仰即知照此令印發外合行令仰該廳即便遵照辦理此令

中華民國八年 月 日 省長張敬堯

本省文告

◎湖南省長公署訓令 字第 號

令衡陽縣知事(據該縣銷商彭錫榮等呈為遵章採運請領各票由)

為令行事案據該縣銷商彭錫榮等暨熊廣吉等以遵章採運呈請領票等情先後具呈到署除批呈粘均悉查各縣抽收硝稅一項曾經譚前省長修定土硝發票章程凡採運各商除遵章本來公署繳納票費外其他縣中各項捐稅概不准行等因通令遵照在案據呈前情應准令飭該縣知事查明核辦以符定案至請由本署發給採運各票一節仰即照章填具保切各結備費具領可也此批掛發外合行檢同副呈令仰該知事即便查明核辦具報備案此令

中華民國八年六月 日 省長張敬堯

◎湖南省長公署訓令 字第 號

令 湖田局 (據姚麓波呈捧批瀆請仰懇查據原呈令縣秉公復訊以保成例而斬訟蔓由)

為令行事案據 華容縣 縣民人姚麓波等以捧批瀆請仰懇查據原呈令縣秉公復訊以保成例而斬訟蔓等情具呈到署除批呈悉此案前據該民等來呈業經令行湖田局核飭遵照在案茲復據稱此案非經界水利溢畝之爭純係修堤問題已訴呈縣知事公署在案等情事關堤務應准令飭華容縣知事秉公復訊并分令湖田局知照此批掛發外合行抄發原呈令仰該局 即便知 秉公復訊具復核奪切切 照此令

中華民國八年六月十七日 省長張敬堯

指令

◎湖南省長公署指令法字第六二九四號

令高等檢察廳檢察長王淮琛（呈一件呈甯鄉縣知事疏脫遞解死刑人犯請提付懲戒由）

呈悉甯鄉縣知事余聯輝對於發回執行死刑人犯並不遴派得力隊兵妥慎遞解致令中途疏脫實屬異常玩忽廢弛職務依文官懲戒條例第二條第二款應受懲戒仰候咨呈

國務院轉呈

大總統交付懲戒以儆疏懈一面仍由該廳嚴令該知事及通飭所屬一體緝拿逃犯蔣福興務獲究報並令提取原解除隊兵研訊有無賄縱情弊分別依法辦理此令

中華民國八年六月 日 省長張敬堯

◎湖南省長公署指令 字第 號

令湘鄉縣知事（呈甯華教士黃瑞堂接管教堂房產清冊請分別存轉由）

呈冊均悉查各縣護送來省之待遣敵籍教士前因久無船期集合一處殊形困難當經本兼省長電商內務部准覆應將已集各敵僑仍令各回原地隨飭省會警察廳諭知各敵僑起程回縣在案所有該縣敵籍教士郝理格前次委託華教士黃瑞堂接管之教堂產業現在該教士既與許教士德道一同回縣應由該知事轉飭黃瑞堂照單交還以資管業仰即遵照此令清冊存

中華民國八年 月 日 省長張敬堯

◎湖南省長公署指令 字第 號

令平江縣知事(呈為遵令查明啟明女校職業各班學生數目懇核示由)

呈表均悉查該校各班學生僅縫紉科第五班十八名餘均不足規定人數本應停減補助金以符前令姑念該校成績較優且校舍駐兵損失甚鉅准予照舊給費以示體恤至稱俟舊班畢業再招新生一節應予照准仰即轉飭知照此令表存

中華民國八年六月 日 省長張敬堯

◎湖南省長公署指令 字第 號

令湘潭縣知事(呈一件為組織湘潭城鄉女子蠶桑社會訂定辦法請鑒核由)

呈摺均悉查植桑飼蠶煉繅繅絲原為婦女之天職如果認真提倡實地練習程功甚速收效自宏注重女子獨自謀生以減輕男子之負擔承家族社會之敝而濟其窮計無有善于此者茲據該知事創設該縣第一女子蠶業社擬就簡章七條并訂定城鄉蠶業社植桑會組織辦法暨勸辦蠶桑社會說畧周密綜貫斐亶動人即條教之粲然可觀亦足徵該知事實政實心不難家喻而戶曉仰即隨時督同五路經理各員積極進行應時普及以蔚成他日著作之林本省長有厚望焉仍候善後籌備處令飭遵照此令摺存

中華民國八年六月 日 省長張敬堯

(原呈暨清摺見本期附錄欄內)

● 咨呈

◎ 湖南省長公署咨呈

(咨呈國務院據高等檢察廳呈稱寧鄉知事余聯輝疏脫遞解死刑人犯請提付懲戒由)

湖南省長公署爲咨呈事案據高等檢察廳檢察長王淮琛呈稱民國八年五月二十八日據寧鄉縣知事余聯輝呈稱本年五月十九日准長沙縣知事公署咨開奉湖南高等檢察廳函交人犯胡梅卿等四名到縣飭即解赴常德地方檢察廳投收等因奉此除派兵押解外相應咨請查收轉遞前進並祈給予印照回銷實爲公便等因並准解送人犯胡梅卿蔣福興舒吉堂祝怡廷等四名案卷三宗原判一件公文一角到署准此知事當即檢同案卷等件飭派隊兵夏順卿等八名將該四犯解赴益陽縣去後旋據該隊兵等回署報稱昨日兵等奉解人犯四名前赴益陽縣行至中途有蔣福興一犯因解兵王少凡忽患痧症乘機打跌解兵夏順卿脫身逃遁追捕無獲等情據此知事隨即將該解兵等提訊據解兵王少凡等供稱兵等奉令遞解人犯胡梅卿舒吉堂蔣福興祝怡廷等四名赴益遵即押送前往解至益境七里橋地方距益陽縣城僅七里許時已黃昏是時龍廷詠等六名解胡舒祝三犯行前兵夏順卿王少凡等兩人解蔣福興一犯行後因蔣犯行步趨趨故與前行者相距約數十丈兵王少凡忽因痧症驟發倒地兵夏順卿正在詢視其疾該犯蔣福興即乘間將兵夏順卿一掌推跌墮下飛跑而去兵夏順卿急起尾追已不能及隨後由龍廷詠等幫同追捕該犯業已遠遁卒未捕獲兵等實係一時因病偶疏并無故縱情弊等語提訊各解兵龍廷詠等供詞相同除由知事將該隊兵夏順卿王少凡等兩名立

即斥革收押再行研訊究辦一面揀派幹隊趕緊追緝並飛咨鄰封飭警協拿務期必獲外所有人犯蔣福興一名中途脫逃緣由理合呈請察核迅予通令各縣一體查緝並乞令示祇遵等情到廳據此查蔣福興係犯殺人罪初審判處死刑控告上告先後駁回經總檢察廳呈奉司法部覆准令行到廳連同本案內判處死刑之胡梅卿判處徒刑之舒吉堂祝怡廷一併解回常德地方檢察廳分別執行之犯據呈報前情除指令提起押解之隊兵王少凡等究明有無情弊依法辦理並先將胡梅卿等三犯遞解前進暨令行常德地方檢察廳查照及飭屬通緝外查遞解人犯中途脫逃知事當負責任曾於五年八月二十二日經福建高等檢察廳呈奉司法部指令比照疏脫監犯條款酌予懲戒在案所謂疏脫條款係指知事懲戒條例第八條第四款而言現在該條例業經廢止凡關於知事懲戒事項曾奉另令悉依文官懲戒法辦理茲寧鄉縣知事余聯輝疏脫遞解死刑人犯一名應如何予以懲戒之處理合呈請鑒核施行等情據此查寧鄉縣知事余聯輝對於發回執行死刑人犯並不遵派得力隊兵妥慎遞解致令中途疏脫實屬異常玩忽廢弛職務依文官懲戒條例第二條第二款應受懲戒既據該檢察長呈揭前來相應咨呈

鈞院希即

查照轉呈

大總統交由懲戒委員會審查實為公便此咨呈

國務總理

中華民國八年六月 日 兼署湖南省長張敬堯

●告示

◎湖南高等審判廳佈告 第 號

為佈告事案奉

司法部銑電開本部呈請於本年七月三十日在京師江蘇湖北三處同時舉行司法官考試併聲明應試人員准其各就近處併不限定省分等語已於本月十三日奉令照准茲京師定於本年七月一日起至十五日止為報考日期仰即通告周知等因奉此合行通告所屬人民凡有合於司法官考試所定資格志願應試者務於限期內前往報考勿得自誤切切此佈

中華民國八年六月 日 廳長高 种

●附錄

◎湘潭縣知事為組織湘潭城鄉女子蠶桑社會呈 省長文附清摺

呈為組設湘潭城鄉女子蠶桑社會訂定辦法仰祈 鑒核事案奉

湖南全省善後籌備處令發善後急切待舉各條飭即研究進行辦法等因奉此仰見鈞座軫念民艱培養元氣之至意欽服莫名知事竊維政策靡定要在救時民庶何加道先謀富屬縣昔稱繁盛今屬劫餘十室九空原狀未復一夫八口生計奇艱為今之計非急求生衆食寡之道終無家給人足之期非注重

女子之獨立謀生無以減輕男子之擔負知事抱民生之主義體地方之情形以爲釜底抽薪莫如從女子之生計入手朝華夕實莫如蠶桑之婦職爲便爰于城總設立湘潭縣第一女子蠶業社訂定簡章七條招女生六十名入飼春蠶業經試辦現飼夏蠶更資練習有此先河以爲導益進而謀比戶之可封復訂定女子蠶桑社會辦法十二條廣爲佈告改設蠶桑社會組設原理撰發說畧分女子蠶業社女子植桑會二種以期隨地推行應時普及惟是女子無組合之能力賴士紳爲合衆之扶助劃城鄉爲五路每路設經理員一人照會富有蠶桑知識之士紳任之各路之各都設助理員照會各都之都正任之各甲設幹事員照會各甲之團正任之以期分途興辦同時并舉至于社會開辦之經費社會長員之資格先後成立之編次統計報告之程序獎罰處分之規則具有專條用資促進凡此者無非仰體蠶籌奉宣上德出水火而衽席子黎復慶生成寓保障于繭絲婦孺亦蒙樂利抑更有請者事業樂于觀成而恒情難於圖始風氣初開獎勵是賴所擬辦法第九條內以蠶桑社會之多寡爲經理助理幹事各員之殿最分別呈請給獎之處應懇俯准以資策勵除貧民工藝廠正在改良進行因利局亦正籌款開辦均俟另文呈報外所有組設城鄉女子蠶桑社會辦法是否有當除呈善後籌備處外理合備文呈請
省長俯賜察核示遵謹呈

計清摺一扣

照抄章程

謹將倡設城總湘潭縣第一女子蠶業社擬定招生簡章七條並城鄉女子蠶桑社會組織辦法佈告暨

蠶桑說畧又分行各路各都各甲照會繕摺呈請

鈞鑒

計開

倡設城總湘潭縣第一女子蠶桑社招生簡章七條

一 本社招女子六十名以十五歲以上四十歲以下之女子資性端慧體質健全樸實耐勞畧知書算者爲合格

一 女生入社須得其父兄或保證人保證書

一 女生住社膳費概由社內擔任通學者須由保證人聲明事故得本社之允許

一 每年分春夏兩期均以出蠶時始業成繭後畢業給予證書出社自營

一 每期成繭後除開支外所得利益以一半津貼女師以一半分別獎勵女生

一 本年春蠶期迫暫招女生即日入社預爲指授藉資練習以備夏蠶時期正式始業

一 女生有志就學者即日來本社報名

勸辦城鄉女子蠶業社女子植桑會組織辦法佈告

照得女織男耕本均勢之職業生衆食寡實致富之要圖自女子之天職不伸男子之擔負以重五女三男似此生齒繁衍之地一夫八口又當生活最高之時生利者一二分利者八九奈之何民不窮且盜也本知事歷官州邑體民疾苦以爲社會之窮除注重女子之獨立謀生以減輕男子之負擔別無救濟之

方法惟是女子之謀生較諸男子其障礙有二一例不治產需費浩大之經營力所不逮二天賦柔弱重苦勞動之工業體所不勝三家政繁瑣人事牽纏需費時日之職務勢所難行此而欲求不費貲財無煩膂力無多時期運輸便而獲利復厚適于女子之謀生者則莫如蠶桑一業蛹種最易滋生桑株樹之墻下一天然之果實耳無虞資本之不充懿筐詩咏女執纜盆禮載婦功一輕便之工作耳無慮纖弱之不勝三眠不過匝月原蠶亦僅九旬短期之程功耳無憂日力之不給及其成功織筒之價操券可獲重金貿絲之氓載塗無須兼顧生計之便莫便于此本知事奉宣 上德軫念民艱秉籌備善後之方權推行盡利之策爰訂女子蠶桑社會組織辦法開列如左

計開

第一條 分城鄉爲五路于各路各該都團設立女子蠶業社 女子植桑會以普及蠶桑業爲主旨 依成立具報本公署時期之先後由本公署隨時編次爲第幾社第幾會

第二條 就城鄉五路每路遴選熱心蠶業之士紳由本公署照會爲女子蠶桑社會經理員以該路各都都總爲助理員各團團總爲幹事員對於該路各都團女子蠶業社女子植桑會分擔發起促進勸導防護之責

第三條 該路助理員幹事員調查各該都團戶口凡有女子二人以上之戶務令其或入蠶業社或入植桑會以期普及

第四條 女子蠶業社研究實習採桑飼蠶煉繭繅絲各學科設女社長一人女教員二人或四人以

曾在蠶業學校或蠶業傳習所畢業得有證書之女子充之或其父兄有蠶業學校及傳習所畢業之資格者其家女子亦得充爲社長由經理員助理員報由本公署委任之女教員以曾在蠶業學校或蠶業傳習所畢業得有證書之女子充之由社長聘用

第五條 城鄉養蠶之戶能組合女子十人以上共同實習者由經理員助理員報明蛹蠶繭多寡數目由本公署派員視察其形式完備具有成績者編爲第幾女子蠶業社

第六條 女子植桑會以培養山林預儲蠶食爲主旨每會設會長一人副會長一人特別會員普通會員無定額以該女子之家在於該境種桑占大多數者公推會長及副會長次多數者爲特別會員又其次者爲普通會員其有承認限期補種者但經出具願書亦仍準其認種之多少得分別爲會長會員願書式另訂之所有各長員姓名均由幹事員冊報經理員彙轉本公署分別給予證書

第七條 種桑之地無論高原下濕及塘角屋邊皆宜廣植其屬於公家之荒地則由助理員幹事員通知該經管租借交由該會植桑私人之荒地則由經理員幹事員通知該業主促令植桑仍將植桑株數報明該植桑會登記一俟成林並布廣告俾各蠶業社就近購採

第八條 各社會組織之始其房屋傢具之借用蠶具之購製蠶業教員之薪食臨時僱役之工資均由各助理員各幹事員分別預籌暫墊一俟該社會蠶桑獲利先提若干歸墊次提若干歸養蠶植桑之女子均分再有贏餘提存爲該社會之公儲以備公用

第九條 各路女子蠶業社暨女子植桑會定限兩月內組織成立即以具報實行成立蚕桑社會之

多寡爲該路經理助理幹事各員之殿最分別呈請省長獎勵其社長會長副會長教員成績優美者由本公署查明分別給予獎章如或奉行不實及由各業主家主深閉固拒者均處以購辦桑株五百株以下千株以上之罰則

第十條 每桑土所種桑株由各幹事員將其株數揭示該處凡入該社會女子之家及桑土鄰近之居戶應同負守望之責如有妨害偷竊情事報由幹事員查明罰以芟草肥壅一日至三日之工作一俟蚕業發達即由公儲項下酌提經費僱工巡查以爲森林警察之基礎

第十一條 各蠶桑社會所有女子之名額蠶蛹繭絲之數量新舊植桑之株數並收支之總額每年於一五八各月分別查造統計各一冊交由經理員彙送本公署備查以資比較而促進其統計表式另訂之

第十二條 女子蠶業社前經組織成立設十二總後街女工場內名曰湘潭縣第一女子蠶業社招生六十名練習尙及春蠶時期現正餉養夏蠶力圖進行以資提倡各路務須遵照上開蠶業社暨植桑會各條趕緊籌備依限成立

以上十二條仰縣屬人等一體遵照務各曉然於生計之原理毅然爲積極之進行將見不一年而蠶桑大興不三年而女子生計以普不五年而地方轉貧以爲富本知事有厚望焉毋違切切此佈

勸辦女子蠶桑社會說畧

說蠶業

蠶業占農業之一部分以言乎高深其育蠶飼桑之法消毒防病之方東西各國言農學者至列爲專科似非吾國女子今日之程度所可企而及然以言乎其淺易則皆普通女子之所與知而與能吾嘗觀于江浙間之蠶業其女子童而習之幾于比戶成風矣大利所趨幾於無人不爭優勝矣孰是業者種桑六十株面積纔八方地歲可養二人以之飼蠶繅絲費時不過一月且可得三人之養其獲利之厚如此吾皖之蠶桑業纔發達于近時耳女子之利幾與江浙同其尤足稱道者桑陰可種旱稻歲有收穫則谷食之補助也三眠之葉連枝並採枝槁皮離剝而儲之則造紙之原料也餘則薪爨于是焉取蠶之屎入藥爲夜明砂亦沃桑之肥料也破繭絲頭且售善價小兒女之紙筆針綫貨足供取給是又蠶桑業之無棄物無遺利也吾國出口貨物絲茶爲兩大宗今茶漸就中落矣絲之利則迄未少衰湘潭處交通便利之地尤商務繁盛之區如果家喻戶曉毅然興辦事至易而收效至速不獨富於一家亦富國之一端也

說種桑

欲求蚕事之發達端賴桑樹之培植種桑之法不一有種子者有扞條者迨其長成均須接換但非一二年後不能移植開辦伊始欲求速效計莫若購買桑條以其發育甚易足應急需也嘗見吾皖人之種桑矣每株相距約五尺迨根幹穩固剪去繁枝每株僅留三杈次年冬令更於三杈上剪去荏弱者杈之盡處俗名放拳以其形似也拳距地約四尺較易吸收水氣故其葉碩大而肥潤又一種名火桑者葉質畧粗所含水分較少每值春雨連綿採以飼蚕尤以相宜培桑之法每年但鋤草二三次立春後澆糞水一二次蓋天然之產無須多費人力也桑條以浙之湖州產爲上近時湖北蚕業試驗場所產亦堪適用價

且廉亟宜先時多擇地點入冬購種比及三年綠雲覆野蚕事大興矣

說蚕業社之設置

蚕業本尋常女工之一惟風氣未開不得不從事于學自科學發明蚕業學說其書充棟非有農業普通知識不堪卒讀茲之招生立社不曰蚕學而曰蠶業者意在略學理而詳實習圖目前之補救也首于城區倡設湘潭縣第一女子蠶業社藉資觀感他日各路學社成立師資無待遠求其便一現時春蠶雖已過時夏蠶尙畧有待各路女子及時求學得其大要卽本年秋蠶來年春蠶之預備其便二立社實習既足以資比較卽足以引起興趣進化之速有一日而千里者其便三學社林立女子可以就近求學父兄亦便于視察其便四蠶業爲女子必要之技能無貧富皆可學一經研究有得富者鬪桑土營絲業貧者執蠶工織絲布則富者益富貧者亦富矣其便五具此五利果使各路同時舉辦切實進行發揚一般女子之偉業一洗舊時女子不治生活之陋習行見織工相與居于肆絲商相與趨于途茲之蠶業社又其嚆矢矣

說植桑會之設置

女子植桑會之組織法業經宣布矣至所以植桑必須立會者其故可得而言焉大凡企業之興必始于一多數人之爭競女子植桑會以植桑之多寡分會長會員之等第蓋所以使之相形而奮此其作用一同一興作既有以比較其優劣卽可以交換其智識有會以資觀摩宜事半而功倍矣此其作用二桑葉價格隨時漲落每石四五六元不等大率蠶至三眠食葉較多購採者衆價值日昂此常例也有植桑會

以通聲息行情公議秤權畫一女子不煩辭費矣此其作用三蠶業發明桑條之銷數必暢有會以聯爲團體可爲大批之購運以免耗費于畸零一面自植一面出售既握利權亦普公益此其作用四本邑農會勸學所種桑五千餘株四面佛一帶李氏族學植桑五千株拱極門外吳紳鶴秋植桑二百五十株十八總對河王紳鏡堂植桑一千餘株十二總之發源殿後北六都之姜畚李紳樹人植桑三千餘株是皆于三數年以前導之先河此外各鄉之植桑者度亦不乏其選惟植桑養蠶各戶居處遠隔不相聞問或蠶餘于桑或桑餘于蠶即此困難情形已足令繼起者望而却步今蠶業社女子植桑會同時并興則聲氣相通供求相洽此後必無何種障礙而其利如操左券矣

說氣候土宜

湘潭縣屬三楚區域楚從林本植物叢生之地又禹貢蠶絲列入荊州貢品是爲數千年前產絲名區荆楚壤地相接其氣候土宜自應無甚差別吾皖位于吳頭楚尾之間近百年來大興蠶桑之利且有以紅茶銷數不旺相率拔茶植桑者究之絲產之盛在古不及荆楚在今不及江浙猶復毅然進行如此無他無氣候土宜之說爲之淆惑也惟蠶室宜通氣尤宜避風乍寒乍熱當注意于窗櫺之應閉有時冒雨採桑其葉濡濕必先敷陳于筐簞中臨風晾之再以飼蠶自少病患至種桑之地不必平疇沃壤也山之斜面宅之墻下但有隙地即是桑場惟堅結而雜塊石低窪而屬淤泥者不適于用繭有大如雞卵者亦有小如橄欖者此蓋蠶子種類之異而非氣候土宜使然也本邑地勢西北多平衍南多山東次之山之峻峭而屬蠶者實占少數以之植桑當係最良之地况復蠶桑學說日益發明有寒暑計風雨表以測氣候

有灌溉法培壅法以變土質此外如顯微鏡之查病消毒藥之預防其所以促進蠶桑業者至周至備是在有志于獨立謀生之女子暨倡行一般女子生活計成偉大事業者之熱心毅力乃能相與以有成耳吾其拭目俟之

分行各路女子蠶桑社會經理員各都助理員各甲幹事員照會

爲照會事照得耕織爲齊民之要術蠶桑尤女子之本圖自別女子于不治生產之途已失經國生衆食寡之道其有紡績麻圖生活上之補助者年來復見奪于舶來之織品使不早爲之計將來女子之生計日微即男子之負擔益重長此以往來日大難本知事軫念民依注重女職爲釜底抽薪之計謀家給人足之方爰于城總倡辦女子蠶業社以資先導並撰蠶桑說略以明原理冀以闢女子謀生活之路尤賴士紳扶助之功茲訂有女子蠶業社女子植桑會辦法十二條劃城鄉爲五路每路遴選富有蠶桑業學識者爲各路女子蠶桑業經理員使各總其成于各該路之各都委託各都正爲助理員使各分其任復於各該都之各甲委託各團正爲幹事員使各專其責果能分途興辦同時並舉將見蠶桑遍地社會如林則他日之一縷一絲無非出自羣策羣力女界之幸抑亦地方之福本知事有厚望焉除分行並呈報外相應照會

貴 爲 女子蠶桑社會

員務希勉擔義務一致進行并將依限辦理情形隨時具報查攷此照會

女子蠶桑社會 員

附發蠶桑社會組織辦法佈告一紙 蠶桑說畧一冊